

PROPUESTA DE MOCIÓN QUE PRESENTAMOS A LOS GRUPOS MUNICIPALES DE FSA-PSOE, FORO ASTURIAS, IU-CONVOCATORIA POR ASTURIAS Y PODEMOS, EN DEFENSA Y PROMOCIÓN DE LA MÚSICA Y CULTURA N'ASTURIANU NOS EVENTOS FESTIVOS, EDUCATIVOS Y CULTURALES DE GIJÓN/XIXÓN

El patrimoni cultural asturianu inmaterial y material ye un llegáu qu'ha protexese; polo tanto, ha promovese la so conservación, el so conocimientu ente la sociedá y, nos casos nos que seya posible, la so continuación y la so tresmisión xeneracional.

Dientro de tou esti patrimoni cultural, ún de los pegoyos ye la música asturiana y toles manifestaciones culturales que la pueden arrodia: baille; indumentaria tradicional; lliteratura; artes escéniques, plástiques y audiovisuales... Amás, gran parte d'esta creación cultural, tanto tradicional como contemporánea, espresóse a lo llargo los sieglos y sigue espresándose anguaño en llingua asturiana. Esta evidencia nun causó enxamás nengún conflictu na sociedá asturiana; sinón tolo contrario, porque'l pueblu asturianu siéntese arguyosu de la so identidá cultural y del so patrimoni.

Amás, la ciudá de Xixón ye bien importante dientro de la historia de la música asturiana. Nesta villa nacieron y/o vivieron artistes tan importantes d'esta escena a lo llargo de los últimos 100 años como Obdulia Álvarez "La Busdonga", José González "El Presi", Alberto Martínez Berciano "Berto Turulla", Carlos Rubiera, Felpeyu, Hevia o Nacho Vegas. Tamién surdieron equí delles agrupaciones folclóriques de toa triba que trabayaron desinteresadamente por conservar y difundir la cultura tradicional asturiana. Toos estos artistes y agrupaciones actuaron y actúen n'asturianu y xubieron a escenarios de los 5 continentes, enseñando al mundu lo que ye Asturias y la nuestra cultura; porque la música n'asturianu tendría de tener el mesmu potencial y respetu que'l flamencu n'Andalucía, el fado en Portugal, el blues n'Estaos Xuníos, les rancheres en Méxicu, o la samba en Brasil.

Nesti mandatu municipal qu'acaba d'entamar vemos con preocupación les declaraciones producíes dende parte d'esti Ayuntamiento alredu de la presencia qu'ha tener la música n'asturianu nos eventos festivos d'esta ciudá; unes declaraciones que vulneren derechos fundamentales culturales, llingüísticos, llaborales y de llibertá d'espresión. Polo tanto, presentamos a los grupos municipales que ficieron mención favorable a la llingua y cultura asturiana nel so recién programa electoral de 2023, esta propuesta de moción na que defendemos que s'apruebe lo siguiente:

PRIMERO.- Garantizar en Xixón el cumplimentu de la llegalidá vixente en materia de derechos llingüísticos, culturales, llaborales y de llibertá d'espresión que recueye la Constitución Española, l'Estatutu d'Autonomía, la Llei de Contratación del Sector Públicu, la Llei d'Usu y Promoción del asturianu, el Plan de Normalización Llingüística de Xixón, y les ordenances y planes vixentes nesti conceyu. Amás de respetar el conteníu presente na Declaración Universal de los Derechos Humanos, na Declaración Universal de los Derechos Llingüísticos y na Carta Europea de les Llingües Minoritaries.

SEGUNDO.- Cumplir esta llegalidá significa que, de nenguna manera, una persona nin un colectivu, pue ser discrimináu por espresase en llingua asturiana nin poles sos opiniones.

TERCERO.- Caltener y aumentar en Xixón la programación d'actividaes y d'eventos en llingua asturiana, tanto los rellacionaos cola cultura tradicional como les creaciones culturales contemporánees, a través de les conceyalíes qu'abarquen les árees de Cultura, Educación y Festexos; amás d'en organismos venceyaos a elles como Divertia o la Fundación Municipal d'Educación, Cultura y Universidá Popular.

CUARTO.- Promocionar y promover adecuadamente esti tipu d'actividaes dientro de la ciuda de Xixón pa que la so incidencia social seya la mayor posible. Porque cuanto más visible y conocíu socialmente seya esti patrimoniu cultural, meyor va protexese, conservase, valorase y tresmitise ente les xeneraciones venideres.

En Gijón/Xixón a 05 de xunetu de 2023

PROMOTORES MANIFIESTU "MÚSICA N'ASTURIANU SÍ"

ATENÉU OBRERU DE XIXÓN

ASOCIACIÓN GRANA

CAJA DE MÚSICOS

SOCIEDAD CULTURAL GESTO

SOCIEDAD CULTURAL GIJONESA